



**ACTA DA SESIÓN EXTRAORDINARIA E URXENTE CELEBRADA POLO PLENO DA
CORPORACIÓN EN DATA 27 DE NOVEMBRO DE 2014.**

ASISTENTES:

ALCALDESA-PRESIDENTA:

D^a. María Loureiro García.

CONCELLEIROS:

D. Jesús Antonio Fernández Cal, D. Vicente Hermida Rodríguez., D^a. M^a. Isabel Rodríguez López, D. Carlos Alberto Gueimunde Cabaleiro, D^a. Covadonga Viamonte Aguirar, D. Bernardo José Fraga Galdo, D. Manuel Galdo Dopico, D^a. Olaia Casas Chaves, Antonio José Bouza Rodil, D^a. M^a Jesús Vale López, D^a. M^a del Carmen Gueimunde González, D. Celestino Valentín García Paz, D^a. Cándida Méndez Salgado, D. Guillermo Leal Arias e D. Jesús Fernández Fernández.

AUSENCIAS:

D. Jaime Eduardo de Olano Vela

INTERVENTORA

D^a. Rosa Abelleira Fernández

SECRETARIA XERAL

D^a. M^a Luz Balsa Rábade

Na Casa do Excmo. Concello de Viveiro, sendo as trece horas e trinta minutos do día vinte e sete de novembro de dous mil catorce, reúnen-se, en primeira convocatoria, os Sres. Concelleiros citados anteriormente, ó obxecto de celebrar a sesión ordinaria do Pleno da Corporación, baixo a Presidencia da Sra. Alcaldesa, asistida de mín, que como Secretaria Xeral, certifico do acto do Concello.

Comprobado pola Secretaría a existencia do quórum necesario, declárase pola Sra. Alcaldesa aberta a sesión, polo que se procede a tratar os asuntos incluídos na Orde do Día.

1.- RATIFICACIÓN DA URXENCIA DA SESIÓN

Por unanimidade dos presentes, tendo en conta o requerimento para a incoación do expediente de revisión de oficio do segundo punto da convocatoria da presente sesión, ratifican a urxencia da sesión.

2.- INCOACIÓN DE EXPEDIENTE DE REVISIÓN DE OFICIO DOS SEGUINTE ACTOS:

- **ACORDO DA XUNTA DE GOBERNO LOCAL DO CONCELLO DE VIVEIRO, DE DATA 01/10/2009, MEDIANTE O QUE SE OUTORGOU LICENZA DE OBRA MAIOR Á MERCANTIL VESTAS NACELLES SPAIN S.A.U. PARA A AMPLIACIÓN DA PLANTA PARA ENSAMBLAXE DE AEROXERADORES NO LUGAR DE CALVOSO SEGUNDO O PROXECTO BÁSICO ELABORADO POLO ENXEÑEIRO INDUSTRIAL D. JOSÉ MANUEL VILLAR ESMORÍS.**
- **ACORDO DA XUNTA DE GOBERNO LOCAL DE DATA 30/06/2010, MEDIANTE O QUE SE AUTORIZOU A VESTAS NACELLES SPAIN S.A.U. PARA O INICIO DAS OBRAS DE AMPLIACIÓN AMPARADAS NA LICENZA REFERIDA NO PARÁGRAFO ANTERIOR.**



- **ACORDO DA XUNTA DE GOBERNO DE DATA 04/062013, MEDIANTE O QUE SE AUTORIZOU A VESTAS NACELLES SPAIN S.A.U. A AMPLIACIÓN DA LICENZA DE ACTIVIDADE OUTORGADA MEDIANTE RESOLUCIÓN DA ALCALDÍA DO 19/01/2000, PARA ENSAMBLAXE DE AEROXERADOS NO LUGAR DE CALVOSO, CHAVÍN.**

Vista a proposta da Alcaldía para incoación de expediente de revisión de oficio dos tres acordos referidos, que literalmente di:

“María Loureiro García, Alcaldesa-Presidenta do Concello de Viveiro,

En base ós seguintes ANTECEDENTES

Primeiro.- En data 01/10/2009, a Xunta de Goberno Local do Concello de Viveiro outorgou licenza de obra maior á mercantil VESTAS NACELLES SPAIN S.A.U. para a ampliación da planta para ensamblase de aeroxeradores no lugar de Calvoso segundo o proxecto básico elaborado polo enxeñeiro industrial D. José Manuel Villar Esmoris.

Segundo.- En data 30/06/2010, a Xunta de Goberno Local autorizou a VESTAS NACELLES SPAIN S.A.U. para o inicio das obras de ampliación amparadas na licenza referida no punto primeiro.

Terceiro.- En data 04/06/2013, a Xunta de Goberno Local autorizou a VESTAS NACELLES SPAIN S.A.U. a ampliación da licenza de actividade outorgada mediante resolución da Alcaldía do 19/01/2000, para ensamblaxe de aeroxeradores no lugar de Calvoso-Chavín.

Cuarto.- En data 22 de abril de 2014 (nº de rexistro 2.695) recíbese neste Concello escrito da Axencia de Protección da Legalidade Urbanística (APLU) mediante o que se require a revisión de oficio dos acordos de Xunta de Goberno sinalados nos puntos primeiro a terceiro que anteceden.

Quinto.- En data 2 de maio de 2014 (nº de rexistro 3.037) recíbese escrito de D. Fernando Aguirre Vigo no que se solicita a revisión de oficio dos actos firmes dictados por este Concello en data 1 de outubro de 2009 e 30 de xuño de 2010.

En base ós seguintes FUNDAMENTOS

I.- A revisión de oficio dos actos nulos regúlase con carácter xenérico no artigo 102 da Lei 30/1992, de 26 de novembro, de Réxime Xurídico das Administracións Públicas e do Procedemento Administrativo Común (LRXPAC).

En virtude do establecido en dito artigo, as Administracións Públicas, en calquera momento, por iniciativa propia ou por solicitude de interesado, e contando co dictame favorable do Consello de Estado ou órgano consultivo equivalente da Comunidade Autónoma, se o houbese, declararán de oficio a nulidade dos actos administrativos que puxesen fin á vía administrativa ou que non fosen obxecto de recurso en prazo, nos supostos previstos no artigo 62.1

O artigo 62.1 da LRXPAC recolle os supostos nos que os actos das Administracións Públicas incorren en nulidade de pleno dereito, relacionando os seguintes:

- a) Os que lesionen dereitos e liberdades susceptibles de amparo constitucional.*
- b) Os dictados por órgano manifestamente incompetente por razón da materia ou do territorio.*
- c) Os que teñan un contido imposible.*
- d) Os que sexan constitutivos de infracción penal ou se dicten como consecuencia desta.*
- e) Os dictados prescindindo total e absolutamente do procedemento legalmente establecido.*
- f) Os actos expresos ou presuntos contrarios ó ordenamento xurídico polos que se adquiren facultades ou dereitos cando se careza dos requisitos esenciais para a súa adquisición.*
- g) Calquera outro que se estableza expresamente nunha disposición de rango legal.*



O artigo 212 da Lei 9/2002, de 30 de decembro, de Ordenación Urbanística e Protección do Medio Rural de Galicia (LOUGA) remite para a revisión de licenzas ós procedementos previstos na LRXPAC, así como o artigo 64 do Decreto 28/1999, de 21 de xaneiro, polo que se aproba o Regulamento de disciplina urbanística para o desenvolvemento e aplicación da Lei do solo de Galicia (RDUG)

A revisión de oficio, no artigo 102 da LRXPAC non se regula para a Administración con carácter potestativo, senón que se establece con carácter preceptivo (“declararán”).

Os actos que poden ser obxecto de revisión de oficio teñen que cumprir coa premisa de ter posto fin á vía administrativa ou non ter sido recorridos en prazo. Os actos sobre os que se insta a nulidade poñen fin á vía administrativa, de conformidade co previsto no artigo 109 da LRXPAC e 52.2 da LBRL.

A LRXPAC non regula un procedemento concreto a seguir para a revisión de oficio de actos nulos, establecendo simplemente o requisito de que deben contar con dictame favorable do Consello de Estado ou órgano consultivo equivalente da Comunidade Autónoma, polo que a maiores deste trámite especial que especificamente se recolle, deberá acudir á tramitación xeral establecida en dita norma.

O dictame do Consello de Estado ou órgano consultivo equivalente da Comunidade Autónoma (no ámbito da Comunidade Autónoma de Galicia, o Consello Consultivo de Galicia) ten carácter preceptivo e vinculante.

A resolución dictada no procedemento de revisión de oficio deberá ser notificada a cantos interesados figuren no mesmo así como a aqueles que teñan dereitos que podan resultar afectados pola decisión que nel se adopte (artigo 31.1. b) LRXPAC).

O prazo para dictar e notificar a resolución do procedemento é de tres meses. O órgano competente para a tramitación do procedemento poderá acordar a suspensión do prazo para resolver, segundo o artigo 42.5 LRXPAC, polo tempo que medie entre a petición do informe ó Consello Consultivo de Galicia e a recepción do mesmo, que en ningún caso poderá exceder de tres meses e deberá ser notificada ós interesados, e comunicarse a data de petición de informe e a data de recepción.

A resolución deste procedemento será susceptible de recurso administrativo e contencioso-administrativo.

II.- A LRXPAC non establece o órgano competente para incoar nin resolver o procedemento de revisión de oficio. Na normativa das Entidades Locais tampouco se recolle explicitamente a competencia para este procedemento, o que podería levar a englobar a mesma dentro do artigo 21.1 s) da Lei 7/1985, de 2 de abril, de Bases do Réxime Local (LBRL). Por outra banda, o artigo 22.2 k) da LBRL establece como competencia plenaria a declaración de lesividade, e o artigo 110 da mesma norma recolle que corresponden ó Pleno a declaración de nulidade de pleno dereito e revisión dos actos dictados en vía de xestión tributaria. Deste xeito, parece que a competencia para a revisión dos actos nulos de pleno dereito, pola súa transcendencia, tamén debería ser adoptada polo Pleno, aínda que da normativa sinalada non se deduza expresamente. Aínda que a cuestión sobre a competencia pode non estar clara, por parte dos Consellos Consultivos de diversas Comunidades Autónomas vense afirmando que corresponde ó Pleno a competencia para a declaración de nulidade de pleno dereito dos actos do Concello. Neste mesmo sentido se pronuncia a doutrina maioritaria e as sentenzas do Tribunal Supremo de data 3 de xuño de 1985 e de 2 de febreiro de 1987. Considérase polo tanto, en virtude do razoamento que antecede, que a competencia para a revisión de oficio corresponde ó Pleno da Corporación.

III.- O procedemento de revisión de oficio pode comezar a iniciativa da propia Administración autora do acto ou a solicitude dos particulares interesados, mediante a denominada acción de nulidade. Xurisprudencia do Tribunal Supremo entendeu que o concepto de interesados para formular dita solicitude comprende igualmente a outras Administracións Públicas. Respecto destas últimas o artigo 65 da LBRL regula que cando a Administración do Estado ou das Comunidades Autónomas considere, no ámbito das súas respectivas competencias, que un acto ou acordo dalgunha Entidade Local infrinxe o ordenamento xurídico, poderá requerila, invocando expresamente o presente artigo, para que anule dito acto.

A LOUGA recolle no artigo 226.4 as competencias da APLU, establecéndose que en materia de disciplina urbanística terá as demais competencias, a maiores das recollidas explicitamente na LOUGA, que lle sexan



atribuídas nos seus Estatutos. A competencia para formular o requerimento para a anulación de licenzas e autorizacións urbanísticas contrarias á normativa reguladora do urbanismo corresponden á dirección da APLU de conformidade co disposto no artigo 3.h), en relación co artigo 18.b) dos estatutos da APLU, aprobados polo Decreto 213/2007, do 31 de outubro, modificado polo Decreto 450/2009, do 23 de decembro, e no artigo 226.4 f) da LOUGA (tal e como se fundamenta no requerimento de revisión de oficio remitido a este Concello en data 22 de abril de 2014).

IV.- O requerimento de revisión de oficio da APLU baséase nos seguintes fundamentos:

- *No momento da concesión da licenza urbanística municipal para a ampliación da planta para ensamblaxe de aeroxeradores no lugar de Calvoso, outorgada o día 01/10/2009, estaba vixente a LOUGA (coas modificacións introducidas pola Lei 15/2004, do 29 de decembro, pola Lei 6/2007, do 11 de maio, pola Lei 3/2008, do 23 de maio, pola Lei 6/2008, do 19 de xuño e pola Lei 18/2008, do 29 de decembro), e a ordenación urbanística provisional do Concello de Viveiro, aprobada polo Decreto 102/2006, do 22 de xuño.*
- *No momento da concesión da autorización municipal para o inicio das obras de ampliación, outorgada o día 30/06/2010, estaba vixente a LOUGA (cunha nova modificación realizada pola Lei 2/2010, do 25 de marzo), así como pola referida ordenación urbanística provisional do Concello de Viveiro, aprobada polo Decreto 102/2006, do 22 de xuño, modificado posteriormente polo Decreto 89/2010, do 3 de xuño.*
- *No momento da concesión da autorización municipal para a ampliación da licenza de actividade inicial, o día 04/06/2013, estaba vixente a LOUGA (coas novas modificacións introducidas pola Lei 15/2010, do 28 de decembro, pola Lei 4/2012, do 12 de abril e pola Lei 8/2012, do 29 de xuño) e a ordenación urbanística provisional do Concello de Viveiro, aprobada polo Decreto 102/2006, do 22 de xuño, modificado posteriormente polo Decreto 89/2010, do 3 de xuño.*
- *O artigo 8 de Decreto 102/2006, do 22 de xuño, cuxa redacción non resultou afectada pola modificación do Decreto 89/2010, do 3 de xuño, vixente na data dos tres actos administrativos sobre os que se require a revisión, mantivo a clasificación como solo urbanizable non delimitado de uso industrial do ámbito do parque empresarial de Chavín, establecendo que as condicións para o seu desenvolvemento mediante o correspondente plan de sectorización son as recollidas na modificación puntual das normas subsidiarias aprobada definitivamente por Orde do 30 de xuño de 2005, da Consellería de Política Territorial, Obras Públicas e Vivenda.*
- *No momento dos actos referidos non se atopaba aprobado o correspondente plan de sectorización, polo que resulta de aplicación o establecido no artigo 21.4 da LOUGA, cuxa redacción non se veu afectada polas modificacións operadas en dita lei. Este artigo sinala que no solo urbanizable non delimitado, como é o caso, en tanto non se aprobe o correspondente plan de sectorización, aplicarase o réxime establecido para o solo rústico en dita lei. Para o acordo de inicio de obras e ampliación da actividade, a mesma conclusión tamén se deriva, a maiores, da Disposición Adicional Segunda da Lei 2/2010, do 25 de marzo, de modificación da LOUGA.*
- *En base ó esgrimido nos apartados anteriores, o réxime do solo aplicable ós terreos onde se realizaron as obras de ampliación da nave para ensamblaxe de aeroxeradores, no momento dos tres acordos de Xunta de Goberno Local era o réxime de solo rústico previsto nos artigos 31 a 44 da LOUGA.*
- *Según este réxime a construción ou instalación de establecementos de uso industrial é unha actividade prohibida en solo rústico.*
- *Por outra banda, a ampliación de construcións executadas en solo rústico ó abeiro de licenza urbanística e da preceptiva autorización autonómica, como é o caso da construción da planta orixinal para ensamblaxe de aeroxeradores (que conta con autorización autonómica para a construción dunha nave para ensamblaxe de aeroxeradores, outorgada por resolución do 04/06/1999, do delegado provincial de Lugo da Consellería de Política Territorial, Obras Públicas e Vivenda, licenza urbanística para a execución das obras de construción da Xunta de Goberno do Concello de 27/04/2000 e licenza de actividade para ensamblaxe de aeroxeradores eólicos outorgada por Resolución da Alcaldía de data 19/01/2000), está sometida ó requisito da obtención da previa autorización autonómica segundo o establecido na disposición transitoria cuarta da LOUGA. Esta Disposición prevé un réxime especial para este tipo de ampliacións, previa autorización autonómica con arranxo ó establecido no artigo 41 e cumprindo os requisitos expostos na mesma.*



- O Concello de Viveiro non seguiu a tramitación prevista na Disposición Transitoria Cuarta da LOUGA para a adopción dos acordos sobre os que se require a revisión, para o caso de que se cumprisen todos os requisitos esixidos pola mesma, autorización que en todo caso, se tramitaría seguindo o procedemento establecido no artigo 41 da LOUGA.

En base ó exposto, e de conformidade co disposto no artigo 62.1, letras e) e f) da LRXPAC, que sinalan que son nulos de pleno dereito os actos das administracións públicas dictados prescindindo total e absolutamente do procedemento legalmente establecido, así como aqueles contrarios ó ordenamento xurídico polos que se adquiren facultades ou dereitos cando se careza dos requisitos esenciais para a súa adquisición, a APLU considera os actos dictados polo Concello de Viveiro nas datas 01/10/2009, 30/06/2010 e 04/06/2013, nulos de pleno dereito, polo que formula requerimento para a súa revisión.

V.- Tal e como se recolle no requerimento da APLU, a normativa aplicable ós terreos onde se realizaron as obras de ampliación da nave para ensamblaxe de aeroxeradores, no momento dos tres acordos de Xunta de Goberno Local (segundo o establecido no artigo 8 do Decreto 102/2006, do 22 de xuño, e no artigo 21.4 da LOUGA, en consonancia coa Disposición Adicional Segunda da Lei 2/2010, do 25 de marzo, de modificación da LOUGA) era o réxime de solo rústico previsto nos artigos 31 a 44 da LOUGA. Deste xeito, neste suposto, a tramitación a seguir sería a recollida na Disposición Transitoria Cuarta da LOUGA, seguindo o procedemento establecido no artigo 41 de dita norma.

Segundo consta nos expedientes obrantes no Concello non se seguiu a tramitación referida, o que conleva que os actos dictados polo Concello incurran en vicio de nulidade do artigo 62 da LOUGA.

A tenor do artigo 62.1 e) son nulos os actos dictados prescindindo total e absolutamente do procedemento legalmente establecido. A ausencia deste procedemento debe ser clara e manifesta, asimilándose pola xurisprudencia a dita ausencia, a omisión de procedemento adecuado, ou aquelas situacións nas que se aplicou un procedemento distinto ó regrado a tal efecto pola lei, aínda que o resultado práctico poidese chegar a ser idéntico ou presente importantes coincidencias co que debería haberse seguido, así se recolle na sentenza do Tribunal Supremo de data 28 de setembro de 1994. No presente suposto o procedemento a seguir, segundo se expuxo nos fundamentos que anteceden é o recollido na Disposición Transitoria Cuarta da LOUGA, seguindo o procedemento establecido no artigo 41 de dita norma, resultando constatado do expediente que os actos dictados prescindiron de dito procedemento. Así mesmo, tamén se pode apreciar a causa de nulidade prevista no artigo 62.1 f), posto que en virtude dos actos dictados no seu momento, contrarios ó ordenamento xurídico, adquiríronse facultades ou dereitos carecendo dos requisitos esenciais para a súa adquisición, ou cando menos non quedando constatada a existencia dos mesmos.

Constatado que o primeiro acto, dictado en data 01/10/2009 (de concesión da licenza urbanística municipal para a ampliación da planta para ensamblaxe de aeroxeradores no lugar de Calvoso) incurre en nulidade polos motivos expostos, que o acto dictado o 30/06/2010 (de autorización municipal para o inicio das obras de ampliación) está totalmente vinculado ó anterior e que o acto dictado en data 04/06/2013 (de concesión da autorización municipal para a ampliación da licenza de actividade inicial), tamén está totalmente vinculado ó de licenza de obra do ano 2009, en consonancia co establecido no artigo 196 da LOUGA.

VI.- Consta neste Concello a existencia de procedemento contencioso-administrativo en tramitación contra o acordo de Xunta de Goberno Local de data 26 de setembro de 2013 que se segue no Xulgado Contencioso-Administrativo nº 2 de Lugo (procedemento ordinario 261/2013-C), así como a existencia de dilixencias previas en tramitación ante o Xulgado de 1ª Instancia e Instrucción Nº 2 de Viveiro (Nº 839/2013). A apreciación ou non da litispendencia e prexudicialidade penal debería determinarse na tramitación do procedemento.

Esta Alcaldía propón ó Pleno da Corporación a adopción dos seguintes acordos:

1º.- Incoar expediente de revisión de oficio dos seguintes actos:

- Acordo da Xunta de Goberno Local do Concello de Viveiro, de data 01/10/2009, mediante o que se outorgou licenza de obra maior á mercantil VESTAS NACELLES SPAIN S.A.U. para a ampliación da planta para ensamblaxe de aeroxeradores no lugar de Calvoso segundo o proxecto básico elaborado polo enxeñeiro industrial D. José Manuel Villar Esmorís.



- *Acordo da Xunta de Goberno Local, de data 30/06/2010, mediante o que se autorizou a VESTAS NACELLES SPAIN S.A.U. para o inicio das obras de ampliación amparadas na licenza referida no parágrafo anterior.*

- *Acordo da Xunta de Goberno Local, de data 04/06/2013, mediante o que se autorizou a VESTAS NACELLES SPAIN S.A.U. a ampliación da licenza de actividade outorgada mediante resolución da Alcaldía do 19/01/2000, para ensamblaxe de aeroxeradores no lugar de Calvoso-Chavín.*

2º.- Dar traslado do presente acordo de incoación do procedemento de revisión de oficio á Deputación Provincial de Lugo, para o nomeamento de instructor do procedemento.

3º.- Notificar o presente acordo a VESTAS NACELLES SPAIN S.A.U. e a D. Fernando Aguirre Vigo, como interesados no procedemento, informándolles que, sen prexuízo do trámite de audiencia establecido no artigo 84 da LRXPAC, poderán, en calquera momento do procedemento anterior a dito trámite, presentar alegacións segundo o disposto no artigo 79 da LRXPAC.

4º.- Informar ós interesados, segundo o disposto no artigo 42.4 da LRXPAC, que o prazo máximo para a resolución e notificación deste procedemento, en virtude do artigo 102 da LRXPAC é de tres meses. O silencio administrativo nos procedementos de revisión de oficio ten efecto desestimatorio.

5º.- Notificar o presente acordo á Axencia de Protección da Legalidade Urbanística segundo o disposto no artigo 92.5 da LOUGA.

6º.- Acordar, en virtude do artigo 42.5 da LRXPAC, a suspensión do prazo máximo de tres meses para resolver o presente procedemento, polo tempo que medie entre a petición do informe preceptivo e vinculante ó Consello Consultivo de Galicia e a recepción de dito informe, debendo comunicarse a petición e recepción ós interesados. Este prazo de suspensión non poderá exceder en ningún caso de tres meses.

En Viveiro, a 17 de novembro de 2014.

A ALCALDESA

Asdo: María Loureiro García"

Por parte da Alcaldesa procédese á apertura do debate, concedendo a palabra á Secretaria Municipal ós efectos de que se resuman, para a súa clarificación, os fundamentos recollidos na proposta da Alcaldía.

Intervén a Secretaria Municipal para dicir que a revisión de oficio de actos nulos se regula no artigo 102 da LRXPAC, de xeito imperativo e non potestativo para a Administración, debendo declarar de oficio a nulidade dos actos administrativos que puxesen fin á vía administrativa ou que non fosen obxecto de recurso en prazo, nos supostos previstos no artigo 62.1 da LRXPAC. O procedemento a seguir para a revisión de oficio dos actos nulos é o recollido na LRXPAC, debendo contar con dictame preceptivo e vinculante do Consello Consultivo de Galicia. Na normativa local non se regula de forma explícita o órgano competente para incoación e resolución deste procedemento, contemplándose pola doutrina maioritaria, Consellos Consultivos de diversas Comunidades Autónomas e a xurisprudencia do Tribunal Supremo que o órgano competente debe ser o Pleno da Corporación. Consta no Concello requerimento da APLU recibido no mes de abril do presente ano para a incoación deste procedemento, así como solicitude dun particular no mesmo sentido. Menciona que na proposta de Alcaldía se recollen os fundamentos esgrimidos pola APLU para o requerimento de revisión de oficio, fundamentando os motivos de nulidade dos actos requeridos para revisión, no artigo 62.1 e) e f) da LRXPAC, sinalando que non se seguiu a tramitación prevista na Disposición Transitoria Cuarta da LOUGA. Indica que consta a existencia dun proceso contencioso-administrativo e dilixencias previas en tramitación, debendo apreciarse a existencia ou non de litispendencia ou prexudicialidade penal na tramitación do procedemento. Remata mencionando os puntos que se propoñen como acordo na proposta da Alcaldía.



Intervén en representación do Grupo Municipal do P.P., D. Antonio Bouza Rodil, para dicir que se está neste Pleno como consecuencia de outorgar no seu momento licenzas cando non se contaba con todos os informes preceptivos. Sinala que no pleno de xuño deste ano xa se decía que o motivo era moi noble pero fíxose de xeito ilegal, existindo no 2009 un compromiso para darlle legalidade, como era o Plan de Sectorización, que era transcendental e non se levou a cabo, co que se podían evitar todos estes problemas. Engade que a concesión da licenza produce intereses a favor da empresa, que posteriormente reclamará unha indemnización, polo que non entenden como este problema se demorou tanto no tempo. Apunta que lles parece que sería máis lóxico que, se foi a Xunta de Goberno Local a que outorgou as licenzas, sexa tamén a Xunta de Goberno Local a que as revise e anule, aínda que se trouxese ó Pleno para informar. Apunta que esa Xunta de Galicia da que sempre se di que ten unha man negra con Viveiro agora é a que propón unha solución ó problema. Entende que logo haberá que conceder outra nova licenza e o seu grupo non se fía da Alcaldesa nese tema, polo que non van votar en contra pero non a van acompañar nesta decisión, polo que anuncia que o seu grupo se vai abster xa que entende que quen creou este problema que o resolva.

Intervén a Sra. Alcaldesa, D^a. María Loureiro García, para dicir que no seu momento se asumiu unha responsabilidade e por iso están imputados os portavoces daquel momento dos grupos políticos e os membros da Xunta de Goberno Local, apuntando que naquel momento o Sr. Guillermo Leal era o portavoz do P.P., estando tamén ela mesma imputada pola concesión desa licenza. Engade que o Plan de Sectorización se está elaborando por SUPLUSA, pero leva o seu tempo, e non se trata só da tramitación administrativa, senón que tamén hai que expropiar e urbanizar, co que leva unha serie de anos. Sinala que tanto a APLU como Urbanismo da Xunta creen que a vía máis rápida é a revisión de oficio, que ademáis a esixe a lei, e posibilita por outro lado a legalización a través da Disposición Transitoria Cuarta da LOUGA. Manifesta que a postura do P.P. é fácil, lavarse as mans.

Intervén en representación do Grupo Municipal do B.N.G., D. Bernardo Fraga Galdo para dicir que o seu grupo pensa que nesta cuestión, de vital importancia para Viveiro, polos postos de traballo que supón, hai que mollarse. Pregúntalle ó portavoz do P.P. que se este asunto se presenta en xuño, e os cidadáns de Viveiro o elixen como Alcalde tamén diría que quen creou o problema que o resolva. Entende que debe darse unha solución a este problema, aínda que non se compartan algunhas connotacións referentes ó momento da creación do mesmo, e manifesta que o seu grupo vai votar a favor, engadindo que cando a APLU dá unha solución, pola experiencia noutros supostos, é que esa solución é a que vai chegar ó final.

Intervén en representación do Grupo Municipal do i.V.i., D. Guillermo Leal Arias para dicir que o seu grupo vai votar a favor, e que antes e agora se vai mollar. Engade que naquel momento había unha petición do Comité e da propia empresa, e a única solución que se plantexou foi o Plan de Sectorización. Sinala que hai que mirar tamén quen fixo a denuncia e se ten algo que ver co P.P. Apunta que é fácil non mollarse pero naquel momento houbo que tomar decisións, e hai que ver por un lado que unha persoa que non está xa aquí asumiu unha responsabilidade, porque se ían douscentos postos de traballo de Viveiro, e xogou o seu patrimonio e ir á cadea, xunto co resto de membros da Xunta de Goberno Local, e por outro lado hai que ver quen denunciou. Engade que tamén se podía preguntar agora porqué a APLU non actuou antes, e recalca que se isto segue adiante e hai un derribo tamén haberá que pagar, se hai diñeiro. Apunta a que alguén tería que ter responsabilidade en dar esas licenzas como se deron pero conclúe que o importante é o fin, que se solucione este problema.

Intervén a Sra. Alcaldesa para dicir que a Xunta de Goberno Local non tería problema en revisar as licenzas, pero debe ser o Pleno por entenderese que é o órgano competente.



Intervén en representación do Grupo Municipal do P.P., D. Antonio Bouza Rodil para dicir que a competencia do Pleno non está clara, sinalando que o Plan de Sectorización se puido ter feito dende o ano 2009, recordando que en xuño do presente ano o Grupo Municipal do P.P. instou a que se fixese, asesorándose previamente na Consellería de Medio Ambiente da Xunta de Galicia, onde lles informaban que o prazo máis ou menos era de un ano. Sinala que a preocupación polos postos de traballo é lóxica, que a comparten. Engade que son conscientes que se trata dun asunto de vital importancia para Viveiro, xa que de feito, no ano 1997 houbo moita implicación neste asunto por parte do P.P., poñéndolle a esta empresa á súa disposición uns terreos para que se asentase en Viveiro, e concedéndolle unha licenza en regra no ano 2000. O resto entende que pode ser unha causa moi nobre, pero se se fai á marxe da lei, hai que darse présa en arranxalo. Dille ó portavoz do B.N.G. que se lle toca afrontar o problema o arranxará, pero agora neste momento non impedirán que se leve a cabo pero non o apoiarán.

Intervén a Sra. Alcaldesa para dicir que no momento de concesión da licenza sí estaba o P.P., xa que o Sr. Guillermo Leal Arias era naquel momento o portavoz do Grupo Municipal do P.P. Sinala que non vai volver a recalcar o sinalado respecto ó Plan de Sectorización, e indica que en Urbanismo da Xunta de Galicia propoñían un Plan de Sectorización Parcial que non se podía realizar por impedilo a normativa urbanística de Viveiro.

Intervén en representación do Grupo Municipal do P.P. D. Antonio Bouza Rodil para dicir que naquel momento se asumiu unha responsabilidade, a de desenrolar o Plan de Sectorización, que non seu cumpriu.

Intervén en representación do Grupo Municipal do B.N.G., D. Bernardo Fraga Galdo para dicir que está de acordo en que a solución a este problema se demorou, pero necesita unha solución canto antes.

Intervén en representación do Grupo Municipal do i.V.i., D. Guillermo Leal Arias para dicir que se houbera un polígono perfectamente delimitado non habería este problema, pero entende que a APLU obriga a tomar esta decisión e hai que tomala.

Non existindo máis debate sobre este asunto procédese á votación, acordándose por 11 votos a favor correspondentes ós grupos do P.S.O.E., B.N.G. e i.V.i, e 5 abstencións correspondentes ó grupo do P.P., aprobar a proposta da Alcaldía de incoación de expediente de revisión de oficio, do seguinte xeito:

1º.- Incoar expediente de revisión de oficio dos seguintes actos:

- Acordo da Xunta de Goberno Local do Concello de Viveiro, de data 01/10/2009, mediante o que se outorgou licenza de obra maior á mercantil VESTAS NACELLES SPAIN S.A.U. para a ampliación da planta para ensamblaxe de aeroxeradores no lugar de Calvoso segundo o proxecto básico elaborado polo enxeñeiro industrial D. José Manuel Villar Esmorís.

- Acordo da Xunta de Goberno Local, de data 30/06/2010, mediante o que se autorizou a VESTAS NACELLES SPAIN S.A.U. para o inicio das obras de ampliación amparadas na licenza referida no parágrafo anterior.

- Acordo da Xunta de Goberno Local, de data 04/06/2013, mediante o que se autorizou a VESTAS NACELLES SPAIN S.A.U. a ampliación da licenza de actividade outorgada mediante resolución da Alcaldía do 19/01/2000, para ensamblaxe de aeroxeradores no lugar de Calvoso-Chavín.



2º.- Dar traslado do presente acordo de incoación do procedemento de revisión de oficio á Deputación Provincial de Lugo, para o nomeamento de instructor do procedemento.

3º.- Notificar o presente acordo a VESTAS NACELLES SPAIN S.A.U. e a D. Fernando Aguirre Vigo, como interesados no procedemento, informándolles que, sen prexuízo do trámite de audiencia establecido no artigo 84 da LRXPAC, poderán, en calquera momento do procedemento anterior a dito trámite, presentar alegacións segundo o disposto no artigo 79 da LRXPAC.

4º.- Informar ós interesados, segundo o disposto no artigo 42.4 da LRXPAC, que o prazo máximo para a resolución e notificación deste procedemento, en virtude do artigo 102 da LRXPAC é de tres meses. O silencio administrativo nos procedementos de revisión de oficio ten efecto desestimatorio.

5º.- Notificar o presente acordo á Axencia de Protección da Legalidade Urbanística segundo o disposto no artigo 92.5 da LOUGA.

6º.- Acordar, en virtude do artigo 42.5 da LRXPAC, a suspensión do prazo máximo de tres meses para resolver o presente procedemento, polo tempo que medie entre a petición do informe preceptivo e vinculante ó Consello Consultivo de Galicia e a recepción de dito informe, debendo comunicarse a petición e recepción ós interesados. Este prazo de suspensión non poderá exceder en ningún caso de tres meses.

E non habendo máis asuntos que tratar, por parte da Sra. Alcaldesa levántase a sesión, sendo as 14:30 horas do día 27 de novembro de 2014, extendéndose de todo o tratado a presente acta, da que eu, como Secretaria, dou fe.